



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KT 0026457 25
Sarajevo, 25.07.2025. godine

Na temelju člana 35. stav 2. tačka e), te člana 216. stav 3. Zakona o kaznenom postupku Bosne i Hercegovine, donosim

NAREDBU
O NEPROVOĐENJU ISTRAGE

Protiv:
D. F., ...

u vezi kaznene prijave ..., Sarajevo od ... 2025. godine, podnesene zbog ... objave video snimka sa mjesta obilježavanja ... na ... profilu „D. F.“ zbog kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a Kaznenog zakona BiH, iz razloga što što je iz prijave i pratećih spisa očigledno da ne postoje osnovi sumnje da je prijavljeno lice učinilo kazneno djelo, i u vezi Dopisa ... od ... 2024. godine, koji se odnosi na dijeljenje objave sa portala ... na ... profilu „D. F.“ i počinjenje kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona BiH, iz razloga što iz prijave i pratećih spisa proizilazi da prijavljeno djelo nije kazneno djelo.

O B R A Z L O Ž E N J E

Tužiteljstvo Bosne i Hercegovine je, dana ... 2025. godine, zaprimilo kaznenu prijavu ..., broj: ... od ... 2025. godine, podnesenu protiv D. F. iz V., zbog počinjenja kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona BiH.

U kaznenoj prijavi je navedeno da je D. F. povodom neustavnog ..., na svom ... profilu „D. F.“, sa propratnim tekstom sadržaja: ... , objavio video snimak sa mjesta obilježavanja ..., kojom prilikom je istaknuta zastava sa likom presuđenog ratnog zločinca, Ratka Mladića, na kojoj piše „HEROJ“, uz pjesmu njegovog veličanja, čime se, prema navodima u kaznenoj prijavi, vrijeđa dostojanstvo drugog naroda i poziva na mržnju i netrpeljivost.

Povodom predmetne kaznene prijave, ... je, dana ... 2025. godine, Tužiteljstvu Bosne i Hercegovine dostavilo dodatni Dopis, broj: ... od ... 2025. godine, u prilogu kojeg su dostavili dokaze, koji potkrepljuju navode iz njihove prijave od ... 2025. godine, među kojima su

fotokopija o podnesku kaznene prijave Tužiteljstvu Bosne i Hercegovine, CD pod nazivom „D. F. ... 2025. ...“ i fotokopije skeniranih podjela objave i teksta D. F.

Tužiteljstvo Bosne i Hercegovine je, dana ... 2025. godine, Državnoj agenciji za istrage i zaštitu izdalo Naredbu za preduzimanje mjera i radnji, kojom je traženo da državni službenici Agencije preduzmu mjere i radnje iz njihove nadležnosti, u cilju identifikacije prijavljene osobe, odnosno, identifikacije vlasnika ... profila „D. F.“, na kojem je objavljen sporni video snimak, sa naznakom ID oznake korisnika ... profila „D. F.“. Također, Naredbom je zahtijevano da se na pomenutom ... profilu izvrši uviđaj i zadokumentuje predmetna objava sa njenim cjelokupnim sadržajem, te dostavi Izvještaj o preduzetim radnjama, kao i prijedlog daljnjih mjera i radnji u ovom predmetu.

Postupajući po Naredbi Tužiteljstva od ...2025. godine, Državna agencija za istrage i zaštitu dostavila je Akt, broj: ... od ...2025. godine, uz koji je dostavljen Službeni izvještaj, broj: ... od ...2025. godine sa prilogom Službene zabilješke, broj: ... od ...2025. godine.

U Službenom izvještaju Državne agencije za istrage i zaštitu od ... 2025. godine navedeno je da su, dana ...2025. godine, na društvenoj mreži ... izvršene provjere za korisnički profil „D. F.“, kojom prilikom je pronađen profil sa korisničkim imenom „D. F.“, na kojem profilu se na objavljenim fotografijama nalazi NN muška osoba. Utvrđeno je da je Username profila ... Nadalje, vršeći provjere na navedenom profilu, nisu uspjeli pronaći spornu objavu, zbog čega nije bilo moguće realizovati tačku II Naredbe Tužiteljstva, odnosno, nije bilo moguće izvršiti uviđaj nad spornom objavom.

Nadalje, u Službenom izvještaju je navedeno da su u cilju identifikacije lica, državni službenici Agencije izvršili pretrage putem IDDEEA baze podataka za lica D. F., „{...}“. U tom smislu, navedeno je da je za potpunu identifikaciju pomenutog profila potrebno uputiti Zahtjev za međunarodnu pravnu pomoć nadležnim institucijama Sjedinjenih Američkih Država, odnosno... , za dostavu podataka o ... profilu.

Shodno navedenom, Tužiteljstvo Bosne i Hercegovine je, dana 25.02.2025. godine, nadležnom organu Sjedinjenih Američkih Država uputilo Molbu za pružanje međunarodne pravne pomoći, broj: ... od ... 2025. godine, kojom je, u cilju prikupljanja dokaza radi otkrivanja počinitelja kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona Bosne i Hercegovine, zamoljeno da od pravnog lica „(...)“ Sjedinjene Američke Države, pribave i dostave obračunske podatke za korisnika društvene mreže ..., ... odnosno pristupne IP adrese sa vremenima pristupa, e-mail adrese korištenih za kreiranje korisničkog računa, brojeve telefona korištene za administriranje istog, kao i druge podatke koji mogu poslužiti u identifikaciji korisnika navedenog računa.

Tužiteljstvo Bosne i Hercegovine je, dana ... 2025. godine, zaprimilo Akt Ministarstva pravde BiH, broj: ... od ...2025. godine, uz koji je dostavljen ispis mail-a Ministarstva pravde Sjedinjenih Američkih Država od ... 2025. godine, a u kojem je Ured za međunarodne poslove, Kazneni odjel Ministarstva pravde Sjedinjenih Američkih Država obavijestio Tužiteljstvo da nisu u mogućnosti udovoljiti Molbi za pružanje međunarodne pravne pomoći Tužiteljstva od ... 2025. godine. Naime, u mail-u je navedeno da sporna objava na ..., kojom se, kako je navedeno u kaznenoj prijavi, širi nacionalna, rasna i vjerska mržnja, razdor i netrpeljivost, zapravo predstavlja slobodu govora, koja je zaštićena Prvim amandmanom Ustava Sjedinjenih Američkih Država, koji predviđa široku slobodu izražavanja i zabranjuje kazneno gonjenje za

govor, osim u usko definisanim okolnostima. Ova temeljna zaštita se proteže na govor koji se može smatrati kontroverznim, uvredljivim ili pogrdnim. Ustav Sjedinjenih Američkih Država ograničava radnje državnih organa Sjedinjenih Američkih Država za koje se može smatrati da ugrožavaju ove slobode izražavanja. Shodno navedenom, bilo kakva radnja državnih organa Sjedinjenih Američkih Država povodom izvršenja Molbe za pružanje međunarodne pravne pomoći Tužiteljstva Bosne i Hercegovine, ne bi bila u skladu sa suštinskim interesima Sjedinjenih Američkih Država u pogledu ovog temeljnog pravnog principa Sjedinjenih Američkih Država.

Dana, ...2025. godine, iz predmeta Tužiteljstva Bosne i Hercegovine, broj: ..., iz kaznene prijave ..., broj: ... od ... 2024. godine, izdvojeni su Dopis ... "{...}".

Naime, u predmetnom Dopisu ... navedeno je da je na društvenoj mreži ... lice D. F. iz V., na svom ... profilu, dana ...2024. godine, podijelio objavu sa portala ..., pod nazivom ..., ističući da navedenu objavu smatraju vrlo ozbiljnom i prijetećom, kako za ..., tako i za sve preživjele žrtve rata, članove porodica ubijenih i povratnike Bošnjačke nacionalnosti.

Detaljnije, prijavljeni D. F. je predmetnu objavu sa portala ... podijelio uz tekst sljedećeg sadržaja: „{...}“.

Također, ispod predmetne objave, ostavio je i komentar sadržaja: „{...}“

Analizom sadržaja propratnog teksta, kojeg je D. F. napisao u vezi podijeljene objave sa portala ..., kao i sadržaja komentara, ostavljenog ispod predmetne sporne objave, zaključuje se da se u njima ne ostvaruju elementi bića kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona BiH, niti nekog drugog kaznenog djela propisanog u kaznenom zakonodavstvu Bosne i Hercegovine. Naime, sadržaj prethodno citiranog propratnog teksta i ostavljenog komentara ne predstavlja javno izazivanje ili raspirivanje nacionalne, rasne ili vjerske mržnje, razdora ili netrpeljivosti među konstitutivnim narodima i ostalima, kao i drugima koji žive ili borave u Bosni i Hercegovini, kao ni javno podstrekavanje na nasilje ili mržnju usmjerenu protiv grupe osoba ili člana grupe određene s obzirom na rasu, boju kože, vjeroispovijest, porijeklo ili nacionalnu ili etničku pripadnost, čime nisu ostvarena obilježja ovog kaznenog djela propisana u njegovom stavu 1. i stavu 2. Također, nisu ispunjeni ni elementi bića kaznenog djela propisani stavom 3. člana 145a. Kaznenog zakona BiH jer se sadržajem propratnog teksta i ostavljenog komentara javno ne odobrava, poriče, grubo umanjuje niti pokušava opravdati zločin genocida, zločin protiv čovječnosti ili ratni zločin utvrđen pravosnažnom presudom u skladu s Poveljom Međunarodnog vojnog suda pridruženom uz Londonski sporazum od 8. avgusta 1945. ili Međunarodnog kaznenog suda za bivšu Jugoslaviju ili Međunarodnog kaznenog suda ili suda u Bosni i Hercegovini, a usmjereno je protiv grupe lica ili člana grupe određene s obzirom na rasu, boju kože, vjeroispovijest, porijeklo ili nacionalnu ili etničku pripadnost, i to na način koji bi mogao potaknuti na nasilje ili mržnju usmjerenu protiv takve grupe lica ili člana takve grupe. U stavu 4. člana 145a. Kaznenog zakona BiH propisano je: „Ko kazneno djelo iz stava 1. do 3. ovog člana izvrši tako da javnosti učini dostupnim ili joj distribuirati letke, slike ili druge materijale, kazniće se kaznom zatvora od najmanje jedne godine“, na osnovu čega je očigledno da nisu ispunjeni elementi propisani odredbama u navedenom stavu ovog člana. Također se njihovim sadržajem ne ostvaruju ni elementi bića kaznenog djela propisani odredbom člana 145a. stav 5., sadržaja: „Ako je kazneno djelo iz stava 1. do 3. ovog člana

počinjeno na način kojim se može poremetiti javni red i mir ili je prijetelje, zlostavljajuće ili uvredljivo, počinilac će se kazniti kaznom zatvora od najmanje tri godine.“ Isto tako, sadržaj spornog propratnog teksta i komentara ne predstavlja dodjelu priznanja, nagrade, spomenice, bilo kakvog podsjetnika ili bilo kakve privilegije ili slično licu osuđenom pravosnažnom presudom za genocid, zločin protiv čovječnosti ili ratni zločin niti se na bilo koji način veliča lice osuđeno pravosnažnom presudom za genocid, zločin protiv čovječnosti ili ratni zločin, čime nisu ispunjeni elementi bića ovog kaznenog djela, predviđeni u njegovom stavu 6. U pogledu stava 7. člana 145a. Kaznenog zakona BiH, zaključuje se da se ne radi o dužnosniku ili odgovornoj osobi ili zaposleniku u instituciji vlasti ili bilo kojem organu koji se finansira putem javnog budžeta, na temelju čega nisu ispunjeni elementi bića predmetnog kaznenog djela, predviđeni i u njegovom 7. stavu.

Uzimajući u obzir zauzeti stav nadležnog organa Sjedinjenih Američkih Država, po kojem sporna objava na ... profilu D. F., podijeljena povodom obilježavanja neustavnog ..., kojom se, kako je navedeno u kaznenoj prijavi, širi nacionalna, rasna i vjerska mržnja, razdor i netrpeljivost, zapravo predstavlja slobodu govora, koja je zaštićena Prvim amandmanom Ustava Sjedinjenih Američkih Država, koji predviđa široku slobodu izražavanja i zabranjuje kazneno gonjenje za govor, osim u usko definisanim okolnostima, iz kojih razloga Tužiteljstvu Bosne i Hercegovine nisu dostavljeni traženi relevantni podaci vezano za identitet korisnika predmetnog ... profila, u konačnici se nije moglo utvrditi postojanje osnova sumnje da je prijavljeni D. F. učinio kazneno djelo Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona BiH.

U odnosu na dijeljenje objave sa portala ... na ... profilu D. F., Tužiteljstvo Bosne i Hercegovine cijeni da se njenim dijeljenjem, kao i objavljivanjem propratnog teksta i ostavljanjem komentara ispod navedene objave, ne ostvaruju elementi bića kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona BiH, kao niti nekog drugog kaznenog djela predviđenog Kaznenim zakonom BiH.

Stoga je, shodno prethodno obrazloženom, na temelju člana 216. stav 3. Zakona o kaznenom postupku BiH, donesena Naredba o neprovođenju istrage.

U smislu odredbe člana 216. stav 4. Zakona o kaznenom postupku BiH, Tužiteljstvo Bosne i Hercegovine će u Zakonom propisanom roku obavijestiti podnositelja prijave o donošenju ove Naredbe i o mogućnosti ulaganja pritužbe protiv iste Uredu tužitelja, u roku od 8 (osam) dana od dana zaprimanja Obavijesti.

TUŽITELJSTVO/TUŽILAŠTVO BiH
TUŽITELJ